

四庫全書

史部

欽定四庫全書

史部

貴州通志卷四十一

詳校官監察御史<sub>臣</sub>徐如澍

刑部郎中<sub>臣</sub>許兆椿覆勘

總校官編修<sub>臣</sub>倉聖脉

校對官中書<sub>臣</sub>吳甸華

謄錄監生<sub>臣</sub>沈 供

欽定四庫全書

貴州通志卷四十一

藝文

記二

元

八番順元宣慰司題名碑記

范滙

八番順元相傳為夜郎牂柯之表殆古鬼方之境歟蠻  
獠種落雜處叛服不常入我國家軍徇其地諸部悉歸

順始置宣慰使都元帥府總戎以鎮之更貴州為順元  
屯駐城中領萬戶府一鎮撫司一安撫司十長官司五  
而順元思播三宣撫地皆聽撫鎮其任重矣然而土司  
相襲或有爭奪則道路梗塞外連南詔嶺徼兩江溪洞  
侵削關閩往往有之閩政稍弛即戒不虞故官於閩府  
者號稱才難至正十年秋宣慰司都元帥諤勒哲公以臺  
省宿望仁勇兼著蒞政未數月號令肅然旌旗改色於  
是紀綱立法度行百廢興而大府未有題名何以昭

勸懲乃命立石屬余次序而題著之將鐫刻以俟  
來者乃考諸聞見自開闢以迄於今邊政之得失  
才諳之崇卑則公論自在將厯指而議之可不懼  
哉

明

司學題名碑記

趙琬

正統六年冬貴州按察司副使濟寧李君睿奉命  
往按是邦至則宣揚聖化懷柔遠人人用嚮服乃

益修孔子廟學以敦化源而貴州宣慰司之學實  
惟諸州之望君於此尤切注意時按察使莆田林  
君坦副使東鹿朱君理僉事濟南戴君誠左布政  
使宜春易君節左參政錢塘嚴君泰左右參議顧  
君理汪君詠聞之各出俸以給土木而又壘石為  
塔取韋肇慈恩故事考求是邦歷科鄉貢次第書  
其姓名歲月刻於其中凡有善行可法而被顯擢  
者使人有所感發否則有所儆戒於此可以勸世

勵俗所係甚重非他題名可比謂宜有述可以昭  
示永久諸予請記予惟貴州古為南荒椎髻卉裳  
之俗雖唐虞三代之治不能覃被漢唐宋以來不  
過羈縻而已逮我國家列聖相承聲教所暨無間  
遠邇其人始循禮制稱臣奉貢咸若采衛而建學  
立師無異畿甸學者明經登第出而為世用者往  
往與中州士相伯仲然後知皇明統御之大至治  
之隆聲名文物之盛與唐虞三代媲美齊休非漢

唐宋所能企及也李君為朝廷耳目之司循省風俗乃能不鄙夷遠人孜孜以修治學校作興人才為務而於科目士表顯之如此雖然自古賢人君子亦豈藉此以隆其名哉固將為當世用也士由是升於春官入對大廷而顯名太學尚當刮磨淬礪以務求實用顧不偉歟陸宣公嘗曰上不負天子下不負所學吾於題名之士有望焉

平越衛儒學碑記

黃紱



皇明大一統極天地之大而有之惟夏惟夷悉臣  
悉主粵若貴竹古炎荒叢爾苗區其類鳥言獸舌  
椎結卉裳習尚刀戈而好勇鬪狠我太祖高皇帝  
龍飛之初以神武剪其昏狂而納於甄陶之內肇  
置采衛之兵以鎮之於是平越有衛蓋昉乎此然  
當是時功化始行而禮法之教未備故學校並興  
庶官齊建蓋有待於可行之日也歟宣德癸丑宣  
宗章皇帝始命建學置官頒篆而隸於衛泮宮講

室則有貴州按察司副使李公睿僉事屈公伸初  
馬相土之宜得佳勝於衛西南之隅蓋前隆平侯  
為衛之日所居之址也厥位南向厥勢高廣山水  
之清林樾之秀所共鍾萃僉謂協吉遂命指揮王  
俊劉璿版築之殿庭門廡講堂齋舍一時畧備擇  
俊秀子弟為之徒而教焉未幾不肖紱謬叨兩第  
後之起者接武雲蒸神化之速可見矣正統己巳  
諸苗叛亂列城皆圍而平越尤甚兵民困於城中

不能樵採公庭吏廡之楹卒毀為爨惟學宮僅存  
然亦毀瓦畫墁頽垣撤戶曠莫之守師徒散逸而  
絃誦不作其不致於廢學也幾希自後王師赫伐  
削除穢亂而修廢舉墜之政必有待於其人而後  
行今上皇帝嗣位之初簡命左監臣鄭公忠作鎮  
茲土都憲李公浩實巡撫之總制則南寧伯毛公  
榮而佐以叅將吳公經監察御史周公源復按治  
焉時皆文武衆臣賢良寅協咸欲振作頽風廓清

邊鄙以故衆務修舉庶民子來適襄陽呂侯貴以  
錦衣清軍指揮改任於越謁廟之日周視學宮圯  
壞缺畧慨然以為已任且以其子昇嘗第進士為  
地官主事出自學校乃銳意作新捐俸購材倡諸  
寮屬而葺治之櫺星門俱易以石殿庭門廡垣牆  
階陛咸撤其敝而一新之正室神位前則重護以  
板屋黝堊丹漆焜耀潔澤外建儒林坊以表之廟  
學規制之美輪奐之精視昔為有加焉經始於成

化丙戌冬十月而以次年丁亥夏四月訖平越之  
士夫守吏戍卒民庶奔走觀望合詞歡慶乃以其  
成告於總戎毛公聞而嘉之謂紱曰呂昔以金吾  
近臣去國來邊畧不以為窮戚而作新學校思以  
成法化民俾聖人之化行於遠方者已晦而復明  
學校之教施於邊人者已墜而復舉其為功利蓋  
有關於風俗之易移苗情之去逆效順格暴為良  
宜以其事刻之於石以垂不朽紱以謏劣後進曩

服官行人以奉宣天子德教為念而呂侯乃能用  
心及此迄於有成其賢於人也遠矣總戎不沒其  
善既稱許而又為之求記以示永遠豈非有君子  
之心得大臣之體者乎是皆可書也故記之以紀  
歲月因以告夫士之遊於此者皆當自知其性分  
之所固有與其職分之所當為而各俛焉以盡其  
力考求聖經賢傳而講明修齊治平至於忠君孝  
親施於有政舉不外於倫理之常以求復其仁義

禮智之性焉庶無負朝廷建學立教之恩與夫衛  
侯修廢舉墜之意矣於是乎書

布政司題名碑記

蕭儼

洪惟我高皇帝承天肇運混一六合覆載之內悉  
主悉臣睹茲貴州在牂柯之西南即古三苗鬼方  
之域歷代所未服者今皆威之以神武而納於職  
方始建貴州都司統衛所二十以鎮其地錢穀之  
出納刑獄之按治則兼於隣屬迨我文皇帝繼統

守成丕熙洪業永樂十一年乃以貴州漸被治化  
復議設布按二司維時魏郡蔣公廷瓚以行在工  
部侍郎選任左布政使乘傳而來暫造城外之北  
驛館假為公署而聽政焉時思南思州宣慰司尚  
隸湖廣二蠻長田氏梗化不道蔣公奏於朝族其  
家遂以地改設思南思州銅仁石阡鎮遠黎平烏  
羅新化八府及貴州宣慰金筑安撫二司并割雲  
南普定之界為州總隸貴州布政司設官則有左



右布政使左右叅政左右叅議及首領各官視中  
州無甚異宣德中又因民稀事簡復革烏羅新化  
二府併入黎平銅仁其所轄者祇府六州四縣三  
宣慰安撫各一長官司共六十有七而衛之長官  
司不與焉至於官制亦有損益右布政右叅政及  
屬之檢校副理問案牘府之判同縣之丞簿漸次  
裁減不一景泰七年巡撫都御史蔣公琳至以假  
署外館非承流宣化之所奏徙城中得隙地以建

衙宇規制宏壯輪奐一新儼以非才為藩愚闇無  
補但以斯城爰自列聖相繼德化涵煦百年之久  
而前政寅僚奉宣德意漸摩撫循善政遺愛其注  
人耳目而浹人心者也然而世遠人亡不能不泯  
用是撮建置大畧與昔今官僚名位庸刻堅珉庶  
沿革履歷易見來者有徵且知祖宗肇造之艱繼  
化之盛邊俗丕變之懿相與懋修職業益隆治化  
以永終譽於悠久儼則不敢自望相與僚采勉圖

之

鐘鼓樓碑記

白圭

皇明有國度越前古天覆地載悉主悉臣肆惟貴  
州本窮荒三代以前鄙而不治自後雖有羈縻不  
過通使以貢其土物而已我太祖皇帝以大有為  
之君乘天與之運威以神武綏以文德由是城郭  
宮室衣冠禮樂師儒命吏守將戍兵罔不周備而  
鐘鼓樓未建前都知監深水鄭公忠作鎮於茲歷

十五年為成化癸巳公於暇日訪求故老知其故址於城之北隅正街蓋自前元嘗為順元都元帥府所建土城樓國初展其城於今北門而陵夷其廢址世遠人亡無以考其沿革公以是役謀於巡撫都憲宋公欽總戎都督吳公經巡按侍御梁公澤既協其謀而三司僉以為然經始於是年四月八日鑿石南郊掄材北野陶於肆冶於場役匠與夫必更番而不再籍既食而又貸之有若傭者訖

工之日是為明年甲午五月七日樓基以石為臺  
高六尺周方一十六丈有奇虛其中以為通衢屋  
重其簷通高五丈有奇廣與之等而深則殺其五  
之二焉鑄為大鐘者一製為大鼓者四又走使滇  
南募匠製為銅壺滴漏俱以良旦懸鐘寘鼓於樓  
而奠壺於其下自是暮鼓晨鐘更漏有準節候不  
爽晝夜分明遠近之人莫不聳觀而趨聽使夫在  
公者不失其夜寐夙興之期養生者各遂其出作

入息之候又外而使椎結之衆襁負其子而來環  
而觀之若龍蟠虎踞鯨吼雷轟莫不改容而奪氣  
有以潛消其陸梁梗化之心洵可昭示來許垂之  
不朽者於是乎書

重建思州城碑記

盧秩

思州府治春秋時本楚黔中地秦漢吳隋唐以來  
郡治州治建置沿革隨時變易莫有定制宋大觀  
丁亥蕃部長田祐恭願為王民始建思州即今思

南至元間自龍泉坪改置思州宣撫司於此天朝  
鼎命率土賓王洪武壬子改思州宣慰司永樂壬  
辰嗣宣慰者肆惡干罹憲典遂革宣慰司為思州  
府入隸貴藩而領四司自是典郡者率天子命吏  
然而後先相代往往視廨宇如傳舍間有草創復  
為苗寇焚蕩迺成化紀元之初蜀王君常以民部  
尚書郎奉天子簡拔來知是郡仁風流布義問遠  
揚未及三載民有經業乃議築城維時總戎吳經

叅戎彭倫俱頓兵清浪保障邊陲遂立心贊襄力  
主其事經始於成化庚寅訖工於甲午歲凡五更  
役凡萬徒為城一千三百步悉建連屋其上覆以  
陶瓦防風雨霜雪之凌周闢四門架層樓以置鐘  
鼓為寅夜之儆界四門以畫通衢因地勢以建公  
署逋逃四歸商民聚處環城內外櫛比蜂屯鮮有  
空隙絃誦洋溢雞犬熙蕃非復萍浮星散昔之蕭  
索也蓋吏有所據以治事民有所倚以為安不逞



之徒消其覬覦之謀去其艱疏之危宜其皆安堵  
奠枕於今日矣

都御史題名碑記

洪鍾

都御史之設國初無定員地方有大事則請之朝  
遣廷臣往理之九卿正佐隨時簡命亦無定官出  
則奉簡檄給驛廩至其境凡事有宜俗利民者許  
便宜以行即古大夫出疆得專之義也事竟還亦  
無定期至正景間四方多事於是各邊腹地方有

軍務者始遍設之矣貴州巡撫行院舊在省城南隅衙宇僻隘古乾宋公欽始遷建於此後先相承益加闢治規度宏備時題名碑記未立恐其久而難稽也乃遍考舊籍得上元丁公璿以下廿四人并其字貴鐫之於石以圖傳之永久夫巡撫一方安危攸寄而刑賞黜陟舉得以專之惟在公而無私明而無蔽而已鑑惟明也而妍與醜自見衡惟平也而輕與重自分惟其無私無蔽也故妍者重

者無所德而醜者輕者無所怨前之諸公所謂公  
與明者宜無媿矣抑豈無優劣之議者乎渺予小  
子承乏在茲尸素之誚吾固知其難乎免於後之  
人之議之也噫前人之行之而後人議之後人懼其  
議之而不思所以戒之則後之議者將無已矣可  
不慎哉

察院題名碑記

席春

柱下史曰古者天子巡狩方岳開明堂朝諸侯躬

行慶讓故諸侯率職而天下治自秦罷侯置守後  
世相仍天子不復巡狩時遣御史分按天下旌舉  
其吏之賢能而廢職敗度者罷黜之用是有御史  
代天子巡狩之議御史之責重哉夫方岳守令古  
諸侯也御史得舉黜之是故御史良則寮惟貞度  
惟肅否則寮且玩度且弛也夫貞肅玩弛世用淳  
澆而其端在御史御史之任殆難矣貴州古牂柯  
地入國朝為宣慰使司舊隸四川設行都司以控

制之永樂間始設藩省地雜漢夷蒞茲土者撫柔  
允諧則寧輯稍失則叛去加一生事邊徼冒功納  
賄者又從而開其隙則兵革無寧日按茲土者之  
所以難也察院舊有題名碑列開設以來巡按清  
軍刷卷諸公名氏於上迄今無餘地矣數年來代  
而去者闕漏無紀今年春延平胡子國華按是邦  
克振厥職邊鄙賴安暇閱前碑既盈廼謀勒石補  
題舊遺並俟來者春適被命叨按雲貴謂予宜有

言春竊謂諸同官持風裁懋激揚皆有聲於時者  
不類亦獲廁名其上使春果賢後有指而言者曰  
此名御史也否則人將起而議其後矣可懼哉於  
戲人情無所警則玩玩則怠怠則議斯集矣有所  
警則懼懼則慎慎則議斯免矣春乃今視斯石能  
無警乎哲人自勵勉予小子是固胡子勒石意也  
按察司題名碑記

彭 華

貴州古夷蔡域秦漢來羈縻而已或稍稍郡縣終

不能約之就法度我皇明有天下武功文教無遠弗及洪武初即貴州立都司統兵衛暨諸蠻長永樂癸巳遂建布政司悉州郡其地間以宣慰宣撫主之越十八年庚子乃設按察司以掌風紀置按察司副使僉事五員分巡貴寧道安平新鎮思仁四道於是三司相維以治部內咸與中藩等矣顧誕敷教化朝廷固付之有司而操黜陟任激揚使有司循禮法以導民者則在風紀得人與否其所

係重矣同年盧君崇績自湖廣按察副使遷貴州按察使剷奸除弊扶弱植良甫及替吏畏民懷間出巡山谷間里間喜其俗之日遷因歎曰夷俗丕變固聖明之化亦由前此諸公奉揚之也盍錄其名氏勒諸堅珉以示永久乃走書徵予記之予曰先盧君官於貴者奚啻數十百人中固多賢未必盡賢賢者能以禮法持身率下不賢者自放於禮法之外烏足以勸吏導民盧君概書之將使後之



人指其名歆羨其賢者而思取法譏誚其不賢者而內自省惕然戒懼油然而興起懼然共相飭勵以正憲度仰稱聖明設官至意此其有警於在位者無窮矣

興隆衛科貢題名碑記

李聞祥

興隆建學古未始有聞也貴州志稱邑為狼洞歷代罔攸臣其沿革無傳焉暨我明洪武己巳始開衛建官蓋已貢其士而呈其人矣又三十有四年

為宣德甲寅始開學招生徒蓋庶且教之矣然時  
領其事者祇論於鄉而拔焉猶未始有官也又數  
十年為正統癸亥始設官分篆而生徒日益衆盛  
於是人物寔備始赫然與中州並矣未幾今廣西  
右布政使周公瑛遂以春秋領庚午鄉薦登甲戌  
進士第而戊子則朱公玉羅公璿同發己酉則公  
子希默也凡三人其貢士登名胄監然後人知學  
士之貴狄公瑄以迄於今凡十有二人科貢蟬聯

衣冠委蛇視古昔殆將百一焉嗚呼地固若是其  
未改闢也民固若是其未改聚也而賢才之殊異  
乃如此亦獨何哉是固足以見國家變夷之治矣  
弘治二年予以罪謫興隆經歷會學員缺官遂得  
攝學事凡學中規制久已頽廢而諸科貢士僅名  
氏於堂之右壁鐫裂塵蝕日就湮滅間有求其人  
而弗可得者予甚憫焉乃僦工鑿石一通高七尺  
五而廣殺三之一礪為四面畫為四區題曰進士

曰舉人曰監生而次其名氏於本區內仍各虛其  
餘以待來者樹立於戟門之外且亭焉工畢衆遂  
乞予記昔周公之戒成王曰思皇多士生此王國  
王國克生維周之禎蓋言文王之所由興也康王  
之命畢公曰旌別淑慝表厥宅里彰善癉惡樹之  
風聲蓋言殷民之化不出於勸教則凡思佐王國  
而化頑冥者豈復有他道乎亦惟作人材明勸教  
而已矣故予之樹立斯石蓋以彰賢而明教也豈

徒為斯名哉嗚呼名不易得也古昔人非有大功  
德於宗社則不得金石其名氏又有艱苦其行終  
身竟湮沒以幾一名氏而卒弗遂者名豈易得耶  
然則諸賢之勒名斯石者固宜益知所重而將來  
有志之士固宜益知所勸哉誠若是則知所以楨  
王國而率頑冥將於是乎賴也豈惟立石者之惠  
使或士焉而忘其名焉而忘其實祿位焉而怠  
其職與忠則古所謂庸人也已雖貴且富吾無取

馬耳名以遠善亦以遠惡遠之而弗善焉孰與不遠哉諸賢當知辨於此矣謹記

思州府題名碑記

蔡潮

思為古黔中地歷隋唐宋元沿革不一國朝吳元年前宣慰田氏歸附隸湖廣行省永樂壬辰田氏弄兵坐廢改宣慰為府分屬貴藩然地僻民貧洊罹夷燹日敝敝焉鞠為荒翳往年郡守張君常張君价漸次修舉而文獻猶未足徵正德丙子秋上

元高君節守邦之三年嗟茲缺典博詢於長官周  
縉何純輩其所記憶前人之名氏籍貫凡二十六  
人屬記於予予惟思郡最爾一隅猥潛荒服重以  
夷氛歲歉之故吏茲土者恒以投瘴禦魑視之速  
欲解去不能一朝寧處自崔賀啟治以來能久安  
其位不甚鄙夷其民者王張趙李唐孫嚴柴暨今  
高趙數公焉高侯又能於勞來安輯之暇以經術  
訓飭子弟且猶徵文辭以表章思郡思何陋矣

重修司學碑記

費宏

學校之設擇秀民羣處其中而以六經之道訓而  
迪之蓋欲其明大倫崇正學惇治體探化原以成  
君子之行以備公卿百執事之選以收正朝廷治  
天下之功而人才之盛衰俗化之厚薄恒於是乎  
繫實治道之最先且急者高皇帝得國之初即詔  
天下郡縣建學立師以興起文教貴州雖遠在西  
南為禹貢荒服之域而宣慰司之學已建於洪武



甲戌前禮殿後講堂旁為齋若廡而外表之以門  
具如法式景泰間御史楊綱副使李睿嘗因舊增  
修之則又建尊經閣於堂後育英堂於閣前翼之  
幕室以居諸生之講肄者於是乎規制大備而為  
國作人之意益以廣矣百五十年來此邦之士往  
往以明經効用齒於內地豈非以上之聲教所及  
既遠而下之振勵又得其人故耶比者閣日就頽  
而所為育英堂者僅存其故址御史江君汝器以

清戎至見而歎曰春秋大復古古之不復可以為  
非吾責耶謀於巡撫都御史熊君子山巡按御史  
劉君器重議既允協遂卜日鳩工而從事焉堂與  
幕室皆基構如初閣故二楹今增六矣已而撫按  
復用僉事趙公淵議併建神厨及祭器樂器二庫  
徙泮池祀鄉賢凡位置名物之有關於學者罔有  
弗飾經始於甲申秋七月而以乙酉冬十月告成  
其材與力皆江君以罰鍰給之而勞費不及於民

其董治則布政使梁君材按察使于君鏊及各執  
事皆與焉既成使來請記在易之蠱先甲三日後  
甲三日傳曰終則有始天行也蓋興壞相仍亦事  
物自然之理然當其壞也苟不更新以飭乎始丁  
寧以備乎終則已壞者不可復興而已興者且將  
速壞豈君子振民育德之義哉諸君於茲學協志  
畢力易故為新而又欲紀以昭之庶幾久而不廢  
何其勤耶士之藏修於此者其惟念學殖之不可

荒而聖賢之道非六經無所就正日取遺編而玩之精思力踐卓然以天下英才自期待由是進而為百執事公卿遭時之泰則懷仁輔義以尊主庇民脫弗遇其時猶必仗節死義以勉進乎忠孝夫然後無負於今茲育才報國之意若徒志於青紫買櫝而還珠則閣之所尊與堂之所有豈端使然哉

蔡公祠碑記

田秋

生祠非古也記云以死勤事以勞定國能禦大災  
能捍大患則祀之故峴山表叔子之靈宣城著謝  
公之姓是也清平蔡公生祠之作其亦此與正德  
十三年清平縣苗夷作亂據香爐山以為巢穴憑  
陵遠近動搖藩省清平其切近蓋門庭之寇也賊  
擁數千之衆攻城公適以少叅分守其地內無勁  
卒外鮮強援止以數百守城之兵畫地分障運奇  
設謀擒其桀黠散其黨與不數日賊俱引去闔城

老幼得再造皆公之恩也未幾公遷去民不能忘  
迺為生祠二楹肖公像於中飲食必祭且私之曰  
此吾清平之羅池柳侯潮陽韓公也祠成三十餘  
年為嘉靖庚戌麻城喻九山以公高弟僉憲貴陽  
道經清平謁祠下見礪碑尚未有詞徵記於秋秋  
惟公在貴凡八九年不鄙夷其地所在多品題建  
置公之去貴三十年矣而貴人思公德澤者如昔  
公以貴叅議陞福建叅政轉河南右方伯人方仰

其柄用乃抗疏乞休時論高之左布政使思南田  
秋謹記

都察院題名碑記

徐問

貴陽撫院舊存題名碑創於古杭兩江洪公為之  
記兩江後為刑部尚書尋改都察院左都御史余  
嘗官於部見其器度宏博有大臣端揆風記中制  
度沿革疆圉綏威兵民安養亦概言之而所書名  
氏則自正統癸亥迄於正德辛巳以後無餘石而

亦莫為之續也余承乏至見所控諸桀黠吞殘所  
司狎習羈縻弗申大戮而又丁兵後帑藏耗亡既  
已爬搔救集以為邊休其跳梁甚者又弗獲已於  
動衆以為民靖至於軌度之所未能周而風紀之  
所不能廢者非拾公之遺粕以旁搜遠取酌時宜  
以資損益其安所取衷哉夫考其事必知其名知  
其名斯知其人名之不可已也如是古之人箴銘  
簡牘琬琰彛敦為謨訓箴銘類皆圖遠以志勿忘



至其實之所在而為可久者則雖編磨石泐而所以不忘猶存也昔司馬文正公諫院題名有忠詐直回之語將欲揭諸後之人俾矚目警心聿興勸戒然則今日之記寧非後事之師乎用是以懼爰命伐石以續書焉

興隆月潭寺公館碑記

王守仁

興隆之南有巖曰月潭壁立千仞簷垂數百尺其上瀕洞玲瓏浮者若雲霞亘者若虹霓豁若樓殿

門闕懸若鼓鐘編磬幢瓔珞若搏風之鵬翻隼  
翔鵠螭虺之糾蟠猱狔之駭攫譎竒變幻不可具  
狀而其下澄潭邃谷不測之洞環密回伏喬林秀  
木垂蔭蔽虧鳴瀑青溪停迴引映天下之山萃於  
雲貴連亘萬里際天無極行李之往來日攀援下  
上於窮巖絕壑之間雖雅有泉石之僻者一入雲  
貴之途莫不困踣煩厭非復夙好而惟至於茲巖  
之下則又皆灑然開豁心洗目醒雖庸儔俗侶素

不知有山水之遊者亦皆徘徊顧盼相與延戀而  
不忍去則茲巖之盛蓋不言可知矣巖界興隆偏  
橋之間各數十里行者至是皆憊困飢悴宜有休  
息之所而巖麓故有寺附巖之戍卒官吏與凡苗  
夷犵狁之種連屬而居者歲時令節皆於是焉釐  
祝寺漸蕪廢行禮無所憲副滇南朱君文瑞按部  
至是樂茲巖之勝憫行李之艱而從士民之請也  
乃捐貲備材新其寺於巖之右以為釐祝之所曰

吾聞為民者順其心而趨之善今苗夷之人知有尊君親上之禮而憾於弗伸也吾從而利導之不可乎則又因寺之故材與址架樓三楹以為部使者休息之館曰吾聞為政者因勢之所便而成之故事適而民逸今旅無所舍而使者之出師行百里飢不得食勞不得息吾圖其可久而兩利之不亦可乎使遊僧正觀任其勞指揮狄遠度其工千戶某某相其役遠近之施捨勤助者欣然而集

不兩月而工告畢自是飢者有所炊勞者有所休  
遊觀者有所舍釐祝者有所瞻依以為竭忠効誠  
之地而茲巖之奇若增而益勝也正觀將記其事  
於石適余過而請焉予惟君子之政不必專於法  
要在宜於人君子之教不必泥於古要在入於善  
是舉也蓋得之矣況當法網嚴密之時衆方喘息  
憂危動虞牽觸而乃能從容於山水泉石之好行  
其心之所不媿者而無求免於俗焉斯豈非見外

之輕而中有定者能若是乎是誠不可以不志也  
已寺始於戍卒周齋公成於遊僧德彬治於指揮  
劉瑄常智李勝及其屬王威韓儉之徒至是凡三  
葺而公館之建則自今日始

貢院碑記

吳維嶽

貴州古荒服也虞帝北而不畜殷宗克而未化秦  
漢以降逞則瀕洞順亦羈縻無定疆無恒賦至我  
皇明混一寰宇際天所覆寄象鞮譯殊俗向風貴

州遂登版籍尋設學校興冠裳俎豆之儀洪武甲子天下開科取士貴州赴雲南試永樂乙未貴州始樹藩臬建省等內地文教寢明今上凝命中興盡倫盡制澤洽威暢古所不畜而未化者咸入涵濡陶鑄中雖疏蹻巖穴之夫罔不喁喁承德貴士引領開科希奎壁之照者愈切嘉靖庚寅給事中田秋疏為貴士請下撫按議踰五年乙未巡按御史王公杏具奏貴建省設學校養士歷百五十餘

年文教茂往昔十倍諸生就試雲南苦於道路今  
度地得西南隅甚勝可以營建計所需金二千四  
百有奇檢藩貯羨緡可辦夫士盛既足為科而費  
復易措倘另開科可免諸士跋涉益感恩勵學願  
覩賓興盛事以仰贊聖化從秋議便宗伯覆言事  
與時可乃荷俞行限取士二十有五歲丁酉火麗  
金方運屬貴州遂專試諸生驚翔豹變彬彬以升  
放榜日會有龍見之祥次年數策內廷拜秩者四



人又踰十年丙午巡撫王公學益巡按蕭公端蒙  
念貴士愈日盛請廣解額復增五人前後符河圖  
地數維嶽不類祇役茲土今甲子復當大比周視  
棘門疎密罔巒左聳溪環如帶既美其地之盛而  
有待顧碑則缺焉貴州鴻濛弗論即有虞迄昭代  
三千六百餘年甫脫烟莽晦冥遂起為揖讓之區  
又將二百年值我皇上崇文籲俊開科增廣聲教  
闡朗將與中原相雄長顧盛典未述且邊裔鮮掌

故歲月漸久舊簡易湮將希創議成事者或泯或  
消非所以揚丕績而答昌期也因亟蒐使牘採其  
事而伐石以志之如此

修思南府學碑記

李渭

思南學為宣慰氏舊居先師廟乃舊居堂皇兩杏  
樹干霄蔽兩階宣慰氏所植傳者近三百年云若  
為今杏壇樹者樹不易果果惟比士歲登第數視  
果數樹亦奇矣弘治前廟廡規制不稱正德辛巳

郡守李公文敏拓之日久就圯逮隆慶辛未郡守  
育菴田公闢白吏吏出資筭撤朽新焉起敝棟葺  
垂橐華榱藻幹繫幔易瓦自廟廡亭堂門階臺墉  
皆被舊增麗美博士宅先在明倫堂左正德間遷  
於堂右撓不可居還於左至於藏修甲乙舍皆墮  
地矣即舊址復之工有緒將進諸學士綴習其間  
置經史若干費約而勞勩則多矣閭里民毫無喧  
也壬申渭自粵入都過舍省封樹育菴田公泊司

理松滋伍公晉諸譽彥真武觀中論孔子之學育  
菴曰孔學學仁也是日陽和清穆雲行鳥飛天地  
生生大德洪濤兩間在坐者長幼循序答問取次  
誦書歌詩肅肅雖雖渭曰此即仁何以加諸育菴  
省里甲氓隸庸調獎孝弟力田者導不誼以教化  
措法比不用此即仁何以加諸命渭撰學記且欲  
得一二語明孔仁以勵諸譽髦今九載尚虛然諾  
也萬歷戊寅郡守王公崑源以名侍御來思南繼

修之司理王公逢吾屈公心震先後共成之修文  
昌宮培學之左山修櫺星門儼學之具瞻敬一亭  
乃批剝圯矣新其椽墉名宦舊合祀於鄉賢祠奠  
祝雜施也分祠祀之且命場師植翠栢芳桂數百  
章育菴之所未為者益備矣其教膠序給膏楮視  
士比偶文皆罔抒心乃授軌義俾由衷還雅己卯  
占解額即倍往歲興學愛士汲汲然渭不得指拾  
也感今憶往記之曰孔子學學仁也堯舜禹周莫

不以此生人孔子紹述之授於三千朋徒非惟三千朋徒嫻其誼指即顯者邦君卿大夫隱者接輿荷蕢以至難與言如互鄉愚幼如闕黨小子罔不鰓鰓引誘欲人人共立而共達焉用是皇皇於齊衛陳蔡宋楚之邦席不暇煖輟不得輟其心為何心耶孔子四方千古之心與蓋載大德並之無二已今委蛇膠序間讀孔子遺書展袞逐墨并心而赴時父師見其誦讀勤劬不少悖謬師可之父兄

以至朋戚皆稱可不以為非彼亦怡然自許也其  
可而許也果孔子所謂仁者乎長獻於有司信牒  
染楮不可窮以辭有司見其不可窮以辭而其詞  
不忤於衆故有司可之黨里四方人士皆稱可不  
以為非彼亦泰然自滿也其可而滿也果孔子所  
謂仁者乎果為仁即日展褻日逐墨日日學孔也  
否則道越而欲面冥山吾見其日背冥已比就除  
日得蒞蒼赤措注宰割與往歲習於父師獻於有

司者証合否耶其不視往昔所為如故楮弁髦鮮  
矣官足而身退宮室隆矣妻妾容與備矣問其向  
所謂誦讀者十不能記其二三也若夜寐吟嚙中  
事矣已不用又使其子弟為之子弟能趾其所怡  
然泰然者閭里之人靡不哆哆而聲稱有以孔子  
所生人者喁喁歎語即相顧逡巡辟易莫敢或承  
甚有疾視譙諤以為遠且於國家造士顧欲得若  
人已哉昔兩杏樹今栢桂初植培以沃土灌以甘



澤深其根柢以猥大其枝柯根既深惟不害其長  
不得動掘而增設焉孔子之仁即樹根柢也養士  
於膠序也厚其餼廩縱其游習土沃而澤甘欲其  
拔地千丈不稱良於崇朝者也以孔子遺書比偶  
為文詞是枝葉耳國家課士以枝葉因以觀士中  
藏非教人逐逐外驚也至於挾無當空言獵榮邀  
利斧斤伐之牛羊牧之且又濯濯槁矣吾郡士彥  
邇共渭明孔學於川上學舍躬庸德之行篤信底

理彬彬然近仁豈若是瀾瀾下哉育菴田公諱稔  
山東高唐人崑源王公諱琢玉莘縣人逢吾王公  
諱奇嗣蜀之蓬州人心震屈公諱羣言粵之番禺  
人

陽明書院碑記

阮丈中

昔王陽明先生以糾論逆瑾謫居貴陽之龍場者  
三年始至居巖箐與夷犵獠虺為伍於是屏徒侶  
絕書冊盡棄昔時僊佛之見畫體而夕思之已而

忽悟吾心本來之體與古聖賢無殊中夜躍然不自知其手足之舞蹈身之在夷落也而道德之奧經綸之業咸於是乎基焉貴陽舊有祠與書院祀先生既而遷徙靡常僻在委巷中予奉命撫茲地抵祠下歎曰此豈所以妥先生靈者哉檄司府為改建之於是方伯蔡君文憲使馮君成能協其議命知府李濮等董其役擇軍門前左空基為之而增以民居出贖銀以佐其費前為享堂後為講堂俱六楹前後為左右房

各四楹前為二門又前為大門樹卓楔於通衢匾曰陽  
明書院未幾工告成予乃諭於衆曰夫尚德而右功者  
非天地之道乎崇德而報功者非人心之良乎惟先  
生之居龍場也不獨悟徹微旨而功德實大可表見  
維時蠻長欲減驛館變百年成規阿賈阿札等擅兵  
為地方患先生徐出數語以利害喻之其言輒中肯  
綮乃竟落其膽而不敢萌僭肆之念數十年來貴陽  
賴以安堵者非先生之功遺之耶始貴陽人士未知

學先生羣諸弟子日與講明良知之旨聽者勃勃  
感觸日革其澆漓之俗而還諸淳邇者衣冠濟濟  
與齊魯並先生倡導之德至於今不衰改祠宇而  
新廟貌固所以闡揚先烈抑亦以貽後範於無窮  
也雖然先生之功德尤著於江右虔為江之上游  
三巢馮險肆禍相時撫剿動中機宜寧藩不軌大  
戰鄱湖而奏厥績方其鎮虔與撫洪都時日與士  
大夫究心性命雖祁寒暑雨罔輟其所造人才彬

彬然繼師志而効國家之用今在吉有懷德祠在  
虔有報功祠其遐思仰體者視諸貴陽尤甚也故  
人於先生之澤知其汪洋於天下而不知入於江  
右為獨深知其涵濡於江右而不知於貴陽為獨  
至予江右人也而官於貴陽故其知先生之功德  
尤為獨詳雖然先生之孚化翼飛在人耳目者可  
得而言也而其涵養之精粹造詣之淵微非聞見  
之所能窺測者不可得而知也嗣是宦茲境與生

茲地者顧瞻遺像奮志思齊由其可得言者以潛究其不可得而知者庶幾毋忘先生之澤而不辜今日改建之意云

新鎮道題名碑記

孫應鰲

萬厯戊寅平越創建分守新鎮道行省逾庚辰叅議振海黃公駐節於茲樹績宣架起殘敷惠蓋一方遂稱靖謐云粵稽貴竹本古鬼方靡莫地秦漢晉來稍置黔中牂柯夜郎諸郡唐宋元或附楚或

附蜀或置八番羅甸順元宣慰都元帥要以土蠻  
順叛殊狀又隔閼中土故率隨所疏屬而區處之  
未有畫一逮我明威德四被風化昭起為列郡縣  
衛戍設省設臺設閫曰三司埒他藩綱紀法度燦  
然具舉矣省臺各有長有貳省之貳分守各路臺  
之貳分巡兵備各路人莫不展采錯事矣牽他路  
者不論其分守新鎮都清兵巡專轄都勻鎮遠黎  
平三郡龍里新添平越清平都勻興隆黃平七衛



所兼綜湖廣偏橋鎮遠清浪平溪五開銅鼓六衛  
廣西南丹一州山河遼阻蠻苗獷悍壘伍凋廢地  
產些窳皆倍徙他路不可不謂難與劇矣都清兵  
巡駐都勻久在提封中章程之沿革戶賦之征徭  
徼塞之防捍課殿之施設莫不資揆度取裁擇乃  
分守以駐都會去牽路迥遠一切上之人案牘關  
白甚夥故下之人第習知兵巡不復知分守乃分  
守亦延緣往昔之素樂閒適目為吏隱而亦自以

燕安不鈎校非一朝夕所由來漸也萬厯乙亥雲南寅所嚴公清巡撫茲土察之因駐都會諸分守大夫屢日開衙有全無報牒及稟公家計者歎曰分守兵巡均地官要秩分守無所事事若是朝廷列秩本意必不其然遂疏於朝大約謂詰戎勅罰廣厲條憲為兵巡事理財覃澤奠守封疆為分守事銓管雖異實須偕濟不可以獨倚一偏臣簡核分守貴寧同畢節兵巡牽貴筑西路地險苗強止

一兵巡駐畢節難控馭宜以分守貴寧移駐烏撒  
分守新鎮同都清兵巡牽貴筑北路境壤犬牙於  
他藩尤甚刼斂且充牣宜以分守新鎮道移駐平  
越分守安平宜改兼清軍清軍事寡普定距都會  
聲聞易及彼此俱利其鉅細諸務守巡兵備宜協  
恭調贊文武臧否則交互咨詢重大機密則交互  
定命遴委典授則交互詳覆獄訟則交互鞫讞闕  
任則互相權攝兵刑主兵巡分守叅之錢穀主分

守兵巡叅之事可責成官無尸曠免偏重之嫌得  
術業共飭之義策似便制下吏部議如撫臣指制  
下允所請而分守新鎮即移平越矣是時分守巴  
渝劉公世賞爰卜平越城內隙地丁癸向吉選經  
厯劉信董厥工繕造於丙子十二月構豎於丁丑  
三月完美於戊寅二月堂廡廨署門楔階除攸躋  
攸寧有倫有序功既畢諸公俾清平孫生應鰲記  
其事孫生曰凡公署有題名將覈治蹟垂標準備

徵文獻稽實功令抑亦待觀者按評品而彰鑒戒  
之旨咸寓於中茲所營拓已見部使善審畫不再  
具吾聞物聚則好醜形事比則得失辨人並則賢  
不肖判異日士民覩斯石口誦而手摘曰某裨益  
邦域某遺愛在人心有去思某節概當名宦則斯  
石非特分守諸大夫考政鏡德之林實一方所由  
視為甘棠蔽芾勿翦伐敗拜之具哉余固不能私  
不敢私矣

提學道題名碑記

況叔祺

國朝稽古建官尤重文學之臣在兩都命司成掌其事在諸路命憲臣奉璽書乘傳得非隆官師求茂材異等光輔中興之業乎歲己未予自禮官大夫督學貴陽既至閱公署舊無題名夫今之守一官者無論中外巨細其所居必紀名而貴之督學獨闕焉曷以昭懿矩垂將來爰慨文獻之莫徵悼先哲之易泯蒐求往牒咨詢故老得上元沈君而

下凡二十四人以予耳目所睹記其人皆卓犖恬靜韜光匿美列於不朽之塗視他省為獨盛何以哉夫味道腴者甘澹泊薄寵利者樂疎逖巨材隱於深箐丹砂伏於幽巖足跡不履採搆不逮故得全其天真珍奇錦繡列於通衢朝過而夕鬻二者較其遲速不可同日語矣貴陽僻壤寂寞之態等於野戍荒村溺紛華者不居焉然貴雖殊俗雜處章縫之堂皆能習孔孟之說誦仁義之文其質淳

朴愿慤循循雅馴以予振鐸其間甚易相信又其地冬無嚴寒夏無酷暑四時如春得陰陽之和彼煌煌要津炎炎通達或未必勝此也予見宦者多薄貴陽故識之以告夫後之蒞茲土者

建施秉縣城碑記

李曰材

嘉靖乙丑冬施秉縣城成施秉縣者鎮巖邑也古牂柯地明興內附置縣設官正統甲子始縣當岑鰲景洞間西控播凱南枕洪江皆封豨獠猱之隣



而伏弩衷甲之地也獨一面北通郡治走滇楚而  
通上國施固則播洪之苗不敢窺鎮陽而滇楚路  
通若人身然鎮為襟喉而施為肘腋也肘腋嬰患  
則襟喉梗故施秉雖小邑實鎮重地也論者謂欲  
固施秉則城守為急成化間守臣嘗議城岑麓諸  
堡會工鉅不果尋稍調番休衛卒為守戍計嘉靖  
辛酉容山司構亂環甲挺戈焚剽縣治時戍卒無  
能禦者居民竄巖穴間喘息求旦夕活賴一二帥

臣整師誓衆殲元惡縣境旋復而橫罹兵燹者莫可救藥矣使當時城數雉而守之苗雖篤豈能蹂躪至此中丞柱峯趙公奉璽書至歎曰患至為備已無及矣奈何不亟圖之乃與臺察巫公協議為城守計謀之守巡徐君敦張君廷栢僉畫允諧乃檄郡守袁成能守備孫繼武鳩工畫地同知何承訓董其事費計金一千六百有奇粟計一千九百有奇堵計四百一十有奇經始於壬戌孟冬厯三

載乙丑冬告成維時中丞仰亭陳君侍御春樓潘君甫下車揆文奮武圖萬世之利嘉前畫而樂茲城之有成也謂材職載籍當記材按春秋書城郭嚴外防也書城堞慎內治也易曰王公設險以守其國豈惟山川丘陵金城湯池即險也故和戎城而北馬不敢南牧青澗城而夏人不敢東向用此道耳況施秉當鎮扼塞較之和戎青澗功未知先後豈無當於易象春秋之義乎雖然城可守也不

可恃也晉陽之城不浸者三板而卒能扞敵存趙  
子囊城郢而沈尹戍非之豈真城無益哉故城一  
也善守之則環堵皆堅壁不善守之則百雉為寇  
壘語曰公侯干城在得人也衆心成城在得民也  
是為記

貴陽府學碑記

江東之

黔中古西南夷地自高皇帝開乾肇造後遂得列  
為藩服而貴陽尤黔省首郡故牂柯程番地更始

於穆考御極之三年明年秋始設學如今甲一時  
規恢未備姑就陽明書院改署明倫堂羣博士弟  
子員講業其中若聖廟賢廡所為瞻禮陳樂也者  
則第因宣慰而貴陽附焉萬厯甲午春當事者始  
興創建議遂於會城門北得吉壤昔為蜀行都司  
今割入黔偃武修文實相迭運固山川靈秀所鍾  
最勝之遺而都人士所注念已久於是鳩工御石  
今始告成亦閱三年於茲余被命撫黔時用師高

若監司詹君梁君以捷奏於是督學沈君入而申  
之曰詩言既作類宮淮夷攸服先生什倍僖才蠢  
茲苗醜不二於淮獻之訊之行且懷好音也先生  
終無意乎余謂黔即古羅甸國鋒悍時起七萃聯  
鑣士之覽穰苴入彀者與燕趙爭奇亡論已方今  
聖天子右文教諸藩皆以制科加額請特於黔詔  
可豈以諸士異采嫺辭緣飾儒術為足多亦以夷  
方秀出於民鏡檢所歸從今月會旬修蜚騰茂實

中原文獻未之或先斯聖謨之訐也士生斯際千載一時茲廟貌已新適逢其會諸士仰而思之將何以攄所學而不負吾君也矧諸士之先皆來自舊都所稱故家遺俗藉以遠實徼外原操用夏之權向之抵掌而譚據梧而吟者又東越講良知故館諸士服習已深即令學舍移而中有不移者使處為孝悌出為忠良胥自翱翔書囿間養之語云堅樹在始今之時也是謂卑之無甚高論若猥竊

而附於魯頌之末則余豈敢

置貴陽右文田碑記

江東之

余撫黔之三月有青衿子數人謁余曰歲云晏矣  
藿食者憂之余惟貧者士之常而黔士之貧則撫  
者之幸也乃出廩餘分之所及無幾且非可繼也  
及見萬馮兩公創置學田始獲余心業喜而為之  
傳今計田且七十六分以贍府州司三學之貧者  
二公於諸生有豐施矣顧每年租貯定番州廣儲



倉距省四百里而遙使貧士躡蹻度支所得差半  
故郡諸生之無田者獨未沾成惠耳余令州官俟  
價以糶隨價以解士無往來之煩穀收一倍之利  
是不費之說也第思以空言移粟人其謂我何固  
且圖之會屯中清出烏當把路之田若干畝故征  
巴香備餉而今無所用之最號沃疇歲收米二百  
石有奇往輸直十六緡於藩而大半肥佃者余以  
為屑越甚也因念貴陽學宮昔以講武今以修文

烏當之田昔贍戎剛不若贍文髦從今衝輶不馳  
而瑤華耀爽黔雖丹微乎亦知左武矣與直指應  
公議割其田於庠復以三百金置田益之總命之  
為右文云

重修鐘鼓樓碑記

郭子章

萬曆己亥夏六月余奉天子命來撫黔故事三日  
謁文廟廟在城北隅道鐘鼓樓下余仰視之規頗  
昂崇勢若阢崩心識之謂當釐改也於時有夜郎

之役亡論藏匱弗克民敝弗振即吾儕心思弗暇  
及庚子六月六日夜郎平貴陽劉太守文光來黔  
仲秋稍隙守偕徐丞庭綬請於余及柱史宋公曰  
孳壺之政匪棘匪遲君子小人興息維時以司晨  
昏以嚴更漏惟鼓與鐘是賴此黃帝所推迎唐堯  
所敬授者茲樓且圯守甚懼亡以為民觀也葺之  
亟余與宋公敬諾下監司議司檄守會而稽之材  
若干章竹若干箇墜若干畚猴若干鍾赭堊青黝

若干色剗厠鉤繩若干匠錢若干緡守與丞總之  
中軍官劉岳指揮楊師震李棟材槌礮役之千戶  
金鱗李東生百戶王懋勲吏目張大紀護作之辛  
丑六月劉守遷憲副署平越府經理夜郎去天子  
命宋公往按滇命柱史畢公代之畢公至趣其役  
徐丞竭力已事以某月落成而請紀其成於石余  
諗之曰危哉樓也寧獨貯鐘鼓刻漏已乎寧獨辨  
朝夕弗迷風雨已乎黃鐘生一一生萬物君子鑠

金為鐘四時九乳故鐘調則君道得五音十二律  
鼓無當焉而弗鼓弗和其聲一也刻漏法漏水一  
升重一觔時經一刻故鐘為聲氣之母鼓為衆樂  
之君刻漏為中星之驗惟其一也一也者所以一  
民視聽之不一也周禮六典夏官挈壺秋官司寤  
春官雞人漢以後太史掌之隋置刻漏令掌以率  
更教以博士典以掌漏司刻分時唱之漏童更以  
擊鼓為節點以擊鐘為節故含元賦曰節晷漏於

鐘律架危樓之筍虞鐘鼓之有樓舊矣默當珍夷  
歛霧三渡息波之後舉斯樓而更新之景鐘高縣  
夔鼓雷鳴玉衡稱物金壺博施曉而鐘耶吾儕莅  
茲土者何以修天子之業命考其國職講其庶政  
士何以受業何以講貫自成卒庶人而下明而動  
何以耕食何以鑿飲何以蒐苗獮狩夕而鐘耶鼓  
而嚴耶吾儕莅茲土者何以序其業糾其典型儆  
百工使無愒淫而後即安士何以習復何以計過

無憾而後即安自戍卒庶人而下晦而休何以宵  
綯何以夜績庀其家事而後即安庶幾日惜寸陰  
夜知向晨斯樓之新為不徒矣嗟嗟余以斯樓廢  
興之故而重有感也樓創於成化甲午實自鄭都  
知忠始記出白少保圭筆其語周覈通志亦稱忠  
有心計與總兵李貴撫捕諸苗貴人為立祠尸祝  
之今銀璫左貂充斥宇內飛而食人在在重足黔  
以瘠土大兵後主上閔而不遣而吾儕得以韜戈

撤堠之餘因革明時乘隙葺樓以都知始者以吾  
儕新不可謂非大幸故若鄭都知者自今視之固  
亦鐵中之錚錚與而况創樓故碑猶言言也監司  
郡縣衛所與是役者例得書姓氏於石之右

孫文恭祠碑記

郭子章

人情所極慮於身後者在易世之裔與易名之典  
而此二者恒相因也有子孫陳乞雖中才可獲褒  
稱無子孫陳乞即高賢未免堙塲抑勢使然乎亡



論往故如我國家李韓公之功不遜於武寧武順  
而李不謚祺不善終也解大紳之賢不遜於楊文  
貞黃文簡而解不謚家徙遼陽也鄒吏目之忠不  
遜於羅文毅舒文節而鄒不謚雖云秩卑亦其嗣  
斬也人臣生豎太常之勲死為若敖之鬼非國家  
念其故卹其私誰為然已溺之灰而反既失之履  
故人情所極慮而不可必得者國家曲體之令其  
世絕而祀存骨朽而名揚所以彰往而勸來也隆

萬以來此論稍明章耳而目之無子孫陳乞而褒  
謚如故得四人馬少保于公謙改謚忠肅少師夏  
公言謚文愍中丞海公瑞謚忠介尚書孫公應鰲  
謚文恭文恭之謚實章與御史宋公興祖李公時  
華同請者公賜謚詔下章又與御史畢公三才作  
公祠於清平市田以供歲祀平令劉啟周等以公  
祠記來請余計公督學秦中為三秦士師瞽宗北  
雍為天下士師及門入室弟子當有善言師者乃

請於今御史大夫三原溫公溫公故公所簡秦士  
也溫公曰弟子即誦師無若公言公且以哭公集  
杜八首示余讀之令人涕落余辭不獲乃稽公履  
歷記之公姓孫氏諱應鰲字山甫揚州如臯縣人  
占籍清平衛嘉靖丙午舉鄉試第一癸丑成進士  
選庶吉士改戶科給事中出僉江西陝西提學  
副使都察院僉都御史撫治鄖陽入為大理卿遷  
戶部右侍郎改禮部掌國子監祭酒事隆慶改元

上幸學公進講無逸賜茶請告起刑部右侍郎晉  
南京工部尚書卒賜祭墓木拱矣萬厯庚子章  
等為請謚於朝壬寅詔下謚文恭錫之誥命始祠  
公於清平城中余按謚法恭有九義謚公曰恭其  
尊賢貴義執事堅固之謂乎余師胡正甫先生嘗  
語章曰宇內講明正學楚有黃安耿公蜀有內江  
趙公黔有清平孫公吾豫章有南城羅公皆賢人  
也已余入蜀余師與趙孫二公皆捐館舍乃合祀

三公於大儒祠及余入黔別鄒爾瞻江上爾瞻曰  
黔中孫淮海李同野馬心菴皆致力斯學君此行  
惜不及見三君耳余平播後輯黔記乃合三公類  
傳於理學已復為公請謚而得恭乃知正甫先生  
與爾瞻言不我欺也嗟乎公亡易世之裔而得易  
名之典人情所極慮不能必得之身後者公不慮  
而得之遭逢聖明視李解鄒三公千里矣公所著  
有學孔精舍彙稿易談四書近語教秦語錄春秋

節要律呂分解等書共若干卷發明聖學具載諸書立朝大節他日國史當有大書之者茲記止紀公請謚及建祠顏末祠即公書舍故趾袞若干丈長若干丈中為堂祀公堂外為門顏曰工部尚書孫文恭公祠祭田若干畝具在碑陰

西南平播碑記

陶望齡

皇明奄宅方夏象寄所隸極於西南賤熨濮洛烏蠻白夷荒忽么膺前世所弗役莫不筮使纏馭咸

在職貢維播古之郡縣楊氏以唐之季蒙亂固險  
世長厥地顯襲朝號內相君民區裂版章以淪夷  
裔歷宋暨元羈縻弗絕雖聖人繼起洗濯腥穢包  
併荒遠猶取其貌恭因而建置蓋仍徃宜令苟便  
民俗而已至今皇帝御宇神武英斷威德醲鬯仁  
風既宣義殺時舉遂乃誅夏馘倭抗強獷植單弱  
參伐順建旬始隕消維播孽應龍怙其昏嚚湮滅  
彝紀禍茅帷牆以條以蔓天祿姻黨遂延眚黎七

姓五司逢其蠱螫咸仰天搶地而呼曰吾君乎匪  
覆匪載胡遠獨遺天子曰播人余子余可弗問令  
吏召應龍置對逋佚抵嫚未竟厥理用反戈於白  
石疆吏來言狀是當誅討天子曰嗟豈不或悛命  
大臣徂徃宥辟之迨至應龍詭服請受罰贖首領  
自效使者宣上旨褫爵赦死春煦夏長父教母嫗  
惡枿桀息馮倚慈惠長傲滋慝究厥狡狠遂乃放  
兵擾境逆我顏行戕我將士於飛練事聞廷臣僉



曰播徒蟣蝨上不忍爪甲數置之覆用嘔噓此自  
棄天天所廢絕不可宥天子曰然遂以前巡撫遼  
東兵部侍郎李公往總師事建督府成都總統黔  
楚賜劍一得揮誅大將以下而以都御史郭公撫  
黔都御史支公置幕偏沅以江公往楚視師咸聽  
於李公己亥五月公至蜀受事當三方積平士恒  
戈利構饗弗屬公謂以天兵誅小醜當策萬全取  
一決而定於是徵師輓粟內修攻戰具陽示無動

以紓之賊入綦江燒王嶰梗偏隆煽引九股恫喝  
躡轢圖以怵將吏就懷拊公因布之文告賊志果  
岐用緩深入明年春所徵秦魏燕齊滇浙之師暨  
土司兵畢集衆二十萬正月望日登壇誓師五監  
六帥八道並進以伐之推官高折枝先以南川兵  
擣官壩降真州進據桑木蜀帥緹破楠木婁山關  
再與應龍父子遇力戰大殲其軍帥廣別擊斬賊  
大將郭通緒夷崖門以入再捷水牛塘賊棲壘上

楚帥璘盡芟四牌七牌之苗躡青蛇巔戮數千人  
進畧大小三渡而黔師亦再涉烏江毀關以水西  
兵抵於白田壩夏五月諸將士大會海龍壘下公  
命按察使悌來視師無何封侍郎訃至公飲血茹  
涕責戰愈厲六月五日緹應祥兵破其城二翌日  
廣璘攻之城圯衆繼以入應龍縊收其尸係擄妻  
孥盡檻其屬獻闕下皆論如法斬磔於市夫播人  
竄伏榛莽沉於霧靈不覩天地之大日月之朗者

八百年於茲矣則割春斫束身淫威霆鬼其酋不  
敢還睨其視王人天吏若異穹壤一旦更建城邑  
設守令飭新膠庠獮梯虺穴虎豹馮阻者皆剗削  
嶒嶮廓為周道茫施羅甸谿洞君長震疊懲艾益  
祇罔怠明天子刑德我公功烈於是乎遠宜標諸  
金石昭示萬禩永奠我南紀用都司弘吉所相白  
田之南山下銳頂平樹銅柱其上就厥址桃源建  
公生祠銘功德麗牲之石望齡舊史官於職宜有

紀述遂系以辭曰播古州縣端淪於夷封以順完  
地以鄙遺明之肇興鑑先納土膚使窮階仍珪襲  
組南金象齒歲獻於王稱爾干矛載啟戎行天命  
不滔妖興德寡有孽於房有謀於社女戎勝晉禍  
水滅炎大猶弗勝小醜詎堪纓虎冠蛇搖牙噴毒  
嘯及頻鋒刑人以族高高昊天聽民則邇命執罪  
人歸諸尉氏拳拮就訊為我繫囚既縱而西鵠隼  
去羈白石弄兵射天嗥主大吏執言譁張其語糾

聚奸慝公相謹覓糜肉播人用以豢苗鹿鋌其險  
兔狡其窟再抗黠師兇窮罪迄邇人告訕帝用懣  
懣爰命虎臣亂是大戡桓桓虎臣曰維李公惟郭  
暨支佐佑厥庸偏師未集綦城宵壤公狙以詞俾  
疑罔害裒兵聚穀機沉色間難知如陰不動如山  
仡仡王師有來自東盧濮髯微並以兵從師既會  
止神謀電發八道攻進濤掀低壓公曰有命誅止  
其魁播聞鼓聲若旱始雷拜跼扶攜百千其伍有

不用命乃斨以斧重闕蹇我若騫若墜恃險與兵  
以即顛躓殷伐鬼方憊乃克之三月告旋天子之  
釐維播在昔陂池潦洿今始會同乃江乃湖昔為  
鱸菹以飽兕淫今有室家乃父乃兄告爾播人勤  
爾征役襁褓韋衿以償帝力告爾播人維千百祀  
我公之功以名爾子赫赫天威銅標在南逖矣西  
人我公是瞻

傅公祠碑記

馮時可

傅公諱天錫字祐之世系錢塘於宋高祖時為望族迨潁國公友德為明佐命臣潁國四子公行三當元季天下擾攘傾側父子奮身各圖雲臺業因相失焉公長身瑰瑋矯矯若雲中龍為經生即有聲尤工詩詩格高不作大厯以後語暇則談兵屈指穰苴司馬自負為封狼居胥禪姑衍無難者每籌策天下事忼慨中竅揚眉裂眦人不能難應江浙行省試一日忽語同學諸生吾仰測渾儀旁察



方輿江淮間鬱鬱薄層霄成龍文五彩者其天子  
氣耶遂間闕投謁高皇帝被偽兵執送偽將潘允  
明欲臣屈公環以兵公曰聖主出矣我翹然男子  
非若臣也鬚蜩張目光炯炯射賊聲震行幕皆辟  
易不敢兵俄報明李武靖公破富陽餘杭兵壓允  
明營允明謀拒公嘆曰明天子天授神兵百萬前  
茅至此無完卵矣允明雖駭公言抗而與其黨計  
以為然乃計諸公縛偽員外方彛往獻策於武靖

與公語良久奇公因納允明款還薦公拜明州訓導時僧幾先點有謀引倭襲明州因詩通公公得幾先狀以請乃設備誘縛幾先用功陞知大名府元兵犯大名公歷任甫七日備未具不敵綰璽還請就司寇法詔報曰傳某有殊績郡新造非爾咎安置雲南永平公配于氏攜以往明年抵永平又明年拜大理衛知事未幾普安賊安乃叛公督兵與戰不利或勸公逸公曰爾何饒悖失策往吾守

大名不完鄂皇帝不以膏斧使衣冠待罪德甚厚  
非畢命枹鼓曷報免胄搏賊死之土人以奠驛後  
公生寬寬生瑄瑄生易菴證證生教諭江安公風  
風生工科給事中良弼以蹇諤著正德十六年部  
使者奏公忠請於朝立祠祀焉至萬歷十禩而公  
七世嗣侍御公來按黔黔人德公念無能報謀新  
公祠中丞劉公聞之曰偉哉傅氏明德遠矣亟新  
之時可以督學行郵拜瞻公祠悵慕久之因為序

次其事云

葛鏡橋碑記

張鶴鳴

平越之東五里有水濺滴蔣蔣深不可測兩岸皆  
窄崿沓障拔地插天薄岸視之澶湍厓窟若有異  
物盤焉渡舟往往覆沒平越人葛鏡誓建橋初建  
崩壞再建費倍初建建澤沸處又崩壞鏡誓曰吾  
罄家資必成此橋乃於窄崿沓障拔地插天之處  
募工鑿其麓崿崦之石悉展為平陸東西岸合開

約五六丈壘址於淵為蹲鴟鴈齒屹然巨石虹於江上矣余以萬歷四十三年乙卯四月過此江尚舟渡鏡祈檄運木者余為允行四十六年戊午三月余有事勻哈之役鏡橋已成四十八年庚申二月余奉命督陝西三邊移沅交代鏡已物故夫鏡一匹夫耳非有陶朱猗頓之富建橋一念之死不移一建而壞人情已厭之矣再建再壞三建卒成計費不下五六千金人情所更難者聞鏡饒田計

歲米餉口外悉用之橋前後三十年功始成此其  
從容樂善不吝不倦豈世俗人所能企其萬一者  
余嘉鏡之行憐鏡之死又喜其橋成而死得救寧  
也因名葛鏡橋勒石橋上又為記紀之碑如左云  
武侯祠碑記

劉秉仁

世傳諸葛武侯畧地黔中時殆抵牴柯遍金筑云  
又侯所過輒有遺蹟付諸山靈後人發得奇跡闕  
響必謂侯所遺蓋謂非侯其誰宜為也今貯甲銅

鼓兩巖皆謂侯遺蹟蓋故老相傳如是然不可考  
矣南嶼故有祠祀侯前挹郡城下瞰漁磯烟水飄  
渺翠微亦稱廟貌我龍洲王公開府茲土瞻侯祠  
宇想見侯扶漢三分事慨然興懷低徊久之乃手  
侯舊傳增損校讐再四刻之楔貯之祠以為薦紳  
典型以慰眊庶遐思愚嘗反覆深維之見公有遠  
意匪直寓仰止之勤已也忠武在章武時欲完蜀  
以瞰中原之變志圖恢復故其所經畧蜀地務先

警服笮焚諸夷之心要在奪之氣以藉其力曰思  
惟北征宜先入南是也故夷俗習格鬪知兵侯故  
兵威困之夷善匿燧燎原侯故烈焰燔之夷巧避  
毒箐幽岩侯故窮搜之夷信鬼幻惑侯故竒跡閼  
響以震警之謂所過輒有遺蹟付諸山靈者蓋侯  
警夷之一端也夷警而無變然後得藉其力以瞰  
中原此侯之遠謨也閱千百祀來我太祖高皇帝  
兼有區夏削砦落而樹以郡邑夷箐洞而代以控



弦戍守自黔達滇蜀皆星絡雲屯已倍蓰什百於  
侯所措注矣顧國家亦武侯意也夫居今諸夷不  
靖則黔蜀滇不完黔蜀滇不完則非所以重西南  
之屏翰矣然欲靖諸夷匪得侯之才量及侯之規  
畫如侯其人者未足以語此今觀龍洲公之措注  
則得之公自幼挺拔沉浸羣籍馳騁今古歷職方  
卿寺於邊腹形勝險易經畧事宜罔不洞究要領  
故撫臨遐服譬之熟轅游刃也地之貨儲利則啟

蠹則杜途之梗塞高則陂涉則梁兵之募畜十則  
稱戈則比首之魁傑馴則懷叛則兵土之習俗游  
則警情則戒行逾年夷無鼓譟民無讙譁有苗來  
格在在帖寧不與侯之遠謨曠世相孚耶公所經  
畧匪直全黔以完滇即三蜀亦藉公以完如侯之  
故志侯所完蜀雖未足窺中原公所完黔蜀滇則  
屹然為中原一大藩鎮衣裔曰邊器羨曰邊裔具  
而衣澤器完而中好他日舒國家南顧憂者公力

也公之意遠矣大都欲尚友於侯以繼偉畧匪直  
寓仰止之勤已也余於亟傳侯者而深維得之矣  
試持以諭公將謂余知言哉故不揣荒謏而僭記  
之

郭青螺祠碑記

鄒德溥

貴筑介在要服古夜郎羅施之地後漢武侯擒孟  
獲濟濟火從之以從征功表王羅甸則今安氏遠  
祖也安氏立武侯廟於大方前為關侯廟巍然兩

峙水西隔烏江一衣帶便是播州播酋楊應龍獠  
獍負險逆顏行王師屢征不克聖天子赫然震怒  
拊髀思安攘臣廷推泰和郭公才猷將畧足膺重  
閫萬厯二十七年春三月奉勅開府貴州兼督理  
湖川諸軍務夏四月匹馬入黔黔中物力單弱一  
切兵食仰藉楚蜀協濟綦江一陷全貴阨危公請  
增兵益餉以充兵實計募兵守偏橋等十二處要  
害以遏寇衝調補文武將吏叅劾規避以嚴紀律

身先臨賊以倡勇敢總督長垣李公移駐重慶請  
上方劍與公協心朋力而軍政肅然矣明年二月  
公誓師四月進兵首摧賊鋒宣慰安疆臣斬關先  
登弟堯臣佐之大水田一戰獨冠七路興師至璧  
海龍壘纔百餘日六月應龍伏誅劉屍傳首妻孥  
田氏朝棟等七十二名檻俘闕下是役也貴州斬  
獲首級四千八百六十生擒首從一百五十八俘  
獲賊屬男女一千一百一十招降播民二萬九千

八百五十奪獲賊仗不可勝紀天子賚軍興百四  
萬金公僅用其半漕糧三十萬鍾用十之一餘悉  
還帑藏恬然奉身而退溫旨款留以定播地經理  
郡縣新設遵義平越二府正安黃平二州遵義桐  
梓綏陽仁懷湄潭龍泉甕安餘慶八縣改置安化  
貴定二縣播地方平皮林復熾賴公餘威進剿擒  
斬俘獲與播畧相當未幾議播水地界公與新城  
王司馬公議令疆臣入苞茅代播輸將於黔西沙

溪仍舊又未幾議鎮雄公命堯臣孥妻孥還黔代  
兄為宣慰而鎮雄還隴人言公慮遠謀深功高事  
苦然哉先是公以二品誥命改給京銜廕仲子生  
員孔廷入監讀書及叙播功陞右都御史兼兵部  
右侍郎廕長子孝廕孔建男武舉承昊世襲錦衣  
衛指揮僉事三十五年公陳情終養至九疏上不  
得已准養親以俟起用遂得舞斑衣於膝下朝夕  
承歡至三十八年五月大事已襄榮膺卹典四十

年五月叙路山二苗功晉兵部尚書兼都察院右副都御史賜緋魚服給三代誥命孫昊晉錦衣衛指揮同知世襲公乃建忠孝寺於里以報君親恩四十一年皇太后頒賜藏經勅賜寺名大忠孝禪寺公在黔十年始終出處忠孝大畧如此黔人思公恩建生祠祀公者七所俱載祠錄乃宣慰安君堯臣獨建祠大方名曰懷德與諸葛武侯壽亭關侯鼎足而三惟生祠之建自昔有之石慶為齊相



齊人高其行有石相祠藥布守燕燕人服其廩有  
藥公社至荀勉朱邑之遺愛童恢韋義之異政載  
在史冊班班可考而未有專祠殊方者尤未有特  
祠於宣慰者有之自今郭公始宣慰率羅甸人合  
武侯關侯郭侯而並祠之真可謂懷德矣夫德有  
厚薄懷有深淺尸而祝之社而稷之春秋俎豆之  
懷其懷也淺郭公曰忠順宣慰亦化而忠順無迂  
纖毫郭公曰仁厚宣慰亦化而仁厚無隕蠕螻仁

義道德之懷其懷也深畏壘之細民竊竊然祠庾  
桑子庾桑子不釋然曰是妄鑿垣牆而殖蓬蒿也  
何也為淺也物不答施於天地而天地亡恫子不  
謝於父母而父母無憾何也為其深也羅甸人無  
庾桑郭公而天地父母郭公是名曰感其感無心  
是名曰宮應角應其應無跡懷之摯也祠以柱史  
南海馮公奕垣左方伯通政使寧國趙公健配享  
蓋左右郭公施德於黔者例得並書

建設貴定縣碑記

丘未寶

貴定何以始城曰新縣也貴定何以始縣曰改土也然則改土便乎曰道有升降政由俗革標枝野鹿化而冠裳卉服鳥言化而絃誦獠獍之民日控弦鳴鏑嗜鬪如飴一旦化而賣刀買犢由此言之吾安知舊貫之非因循而更張之非善治也惟是時詘舉羸以區區枵腹待哺之黔而動有草昧經綸之計業已郡縣其地勢不得無治有治勢不得

無城有城勢不得不興役動衆而帑藏一空待道  
傍之議委而去之當此之時難於得財乎得人乎  
貴定故龍新之間屬夷地也當萬厯中兩平伐間  
實為崔符之澤往往禦人國門一歲既數見告而  
又黠夷飛詭賦不就徵督撫郭公青螺有憂之於  
是上疏請縣四司治平伐而貴定名焉自是民稍  
稍斂戢窮谷之老有歎生平始見漢官威儀者然  
於城郭宮室禮樂教化謙讓未遑也凡五六年而

今督撫胡公瑞芝來日檄所司城貴定時藩帑如  
洗司會不充先令者且以拮据鞅掌斃於是人益  
側目新封視為堪巖而黠吏益乘是登山嘯梁以  
相恫喝縣中夜數驚胡公聞之曰是不難難於人  
耳於是檄所司遴屬吏有膽智者往而所司同聲  
一詞曰無如獨山萬守是嘗別駕肇慶治兵欽州  
有能吏聲者於是公乃上書請移萬守於獨山城  
貴定當是時人猶言萬公即智畧膽勇能役神使

鬼俾天雨粟耶乃不期年崇墉言言公報貴定城  
矣先是議城約費二千緡猶虞不給公至拓地鳩  
工因民情而盈縮焉百工咸悅民亦子來量田助  
工樂輸恐後纔請金千四百緡而城工訖城四門  
門每相距百餘丈樓櫓稱之濠塹又稱之自是縣  
治巍如象魏秩如比屋翼如人之視貴定又不啻  
通邑大都也易曰天造草昧宜建侯而不寧公其  
所建之人也督撫胡公其建之者耶從此蚩蚩之

民心志日易習俗日移周公孔子之道差可漸被  
益禮樂教化之務與城郭宮室之制若相待而然  
者獨書城成而已哉當是時余在京師目覩兩觀  
之燬工用不興問是何以故或曰少府之金錢不  
給也或曰中璫之估計太濫也或曰奚斯之委用  
無人也嗚呼以蕞爾黔舉一城而有餘以國家全  
盛舉一雉門而不足由前之黔百相委也而城之  
難由後之黔且招提且興梁也而城之易是在人

是在人謹記始末作貴定城記

東坡義烈祠碑記

余懋學

播之役賴主上廟算御史大夫司馬郭公惺籌八  
道陳兵六月奏凱捷聞廷臣合辭頌公神武黔緡  
紳衿弁之士下及田夫野老黃童紅女拜司馬公  
衽席賜亦合辭頌公神武公曰不佞之節鉞從事  
於茲殪鯨鯢築京觀以保此黔諸將士所戮力也  
何敢居露布草疏臚列諸將士斬馘捐殉狀議爵



樹功者祠死義者於是東坡路諸戰亡兵得次第  
舉祠祀先是播不道逆我顏行糾黔東九股苗為  
翼東坡以一如綫路阨其衝既募兵戍守苗日往  
來不得恣大恚憤因舉兵來寇勢甚猖獗衛城老  
稚旦夕惴恐無不相持泣下自分必墮虎口會少  
叅梁公銓駐城中馳請幕府指自集衛三老策曰  
城心腹也東坡肘腋也肘腋誠急當援然勢且及  
城萬一援兵出賊乘虛襲城謂心腹何遂一意嚴

城備士大夫弟子員而下與諸軍荷甕鑿持矛盾  
雜立睥睨間自甲夜達曙無敢交目寢者東坡兵  
殊死戰以衆寡不敵竭力死戰賊屯三晝夜時時  
奔突已兵至城下偵知備嚴乃引去禮以死勤事  
者祀弔祭不至精鬼何依吾師青螺先生檄治祠  
祀錄諸兵忠勤昭示方來存惻忠魂庇之寧宇俾  
無號呼於日寒草短月苦霜白間仁也祠而烝之  
嘗之俎豆之且與簪笏之榮同施不朽茲吾師意

哉噫已亥冬滇值順寧之變予實身在軍時聞播  
賊寇東坡內顧在念不任怵怵憂久之聞賊退幸  
無恙則又不勝欣欣喜非倖也惟梁徐兩公指奉  
謀斷守城而城完是以有今日井廬不改室家相  
保以東坡完興隆微司馬公密畫嘉惠不及此今  
事定司馬公改築吾城垣墉言言并龍新平黃諸  
城雄稱黔東保障而且祠諸兵垂之永世春秋書  
城諸及防予時也董安于於趙簡子縊而死曰我

死晉寧趙氏定矣趙氏祀之諸兵之為興隆死也  
異世同事也城奠生靈祠慰忠魂皆民所欲舉  
之以順民志總為吾隆計久遠非尋常所蠡測者  
茲司馬公意哉咸曰敬聞命祠在東坡站關東經  
始於乙巳秋八月落成於丙午春三月中構堂三  
楹祀站百戶劉宗仁軍兵夏時董邦仁等外周以  
垣垣有門以其羨購田四畝有奇為歲祭資工訖  
請於司馬公顏祠曰義烈凡有勞於祠者暨田區

書碑陰

創建十一城碑記

閃繼迪

漢法之不行於黔也非治黔而廢法不用黔固未  
可以漢法治也萬山林立銳首異軀怪石獐獍狼  
奔虎視箭簇鎗攢散無統紀又山肥水瘠剛柔數  
觔逐隊東馳環繞不定生理窘蹙而衣食以禦人  
倘亦其形局使然故初未嘗不銳意殲洗後廼不  
勝犯不勝誅何也聚則抨弓露刃怒爪磨牙散則

牧犢飲羊鋤犁胼胝皆吾人也又或郊關之外毒  
箐巉崖我不得而至焉囊篋腰纏委之而去倖以  
身免歷險衝危踉蹌呼籲官兵疾馳踪影滅沒甚  
者緊關扼要伏莽鳴張往往失利而返是故始於  
剝商近則目無官長始於攫貨近則人茹慘辱何  
忍言也蓋寨苗以水西為頭額水西以寨苗為爪  
牙反賊熾則截路之寇滋孔道迷則中國之援絕  
威清以南楚然聲斷滇之宦於四方與四方之宦

滇者率北道建昌南假交趾冒瘴癘經歲年而後  
達文軌之世頓若異域者六七年矣朱同人大叅  
奉命監安普軍蒙茸荆棘重開一線厥功綦偉於  
是相地勢酌遠近創議建城者十有一座則盤江  
西坡板橋海子馬場諸要害地皆蠻苗所據盤而  
受指顧於水西者諸城建則宿兵其中出可攻入  
可守行李往來收保足恃且於地之中界壘石為  
樓名曰望高急則樹幟鳴金連珠營可合併邀擊

賊乃不能施其飄風疾雨之故智而我無深入覆  
敗之虞聲應脉合勢如臂指益不血刃而盜賊止  
息威清鳴池間水西賊無復有獷而飲馬者閱二  
年而安邦彥授首餘孽惴惴請降矣是故彼一時  
也生理窮於山川往來窮於盜賊黔幾不可為矣  
公講求長策嘔心竭智用能使山澤崇消光耀閭  
閻寬然戴履無致遺造物之憾然則黔又何不可  
為之與有甚矣公之治黔而長於任事也藉使蚤



得任事如公者何至百餘年羣盜狎處又何至燧  
燭水西禍中全黔而滇受其敝加楚餉請內帑捐  
朝廷金錢千百萬者且十餘禩於此也公為政好  
從塞處求通糾結處作解是役也與盤江鐵橋並  
出人意表肇工在天啟六年丙寅六月迨崇禎四  
年辛未五月而城成戍樓官廨廟貌市廛井井具  
備費取諸節餉捐廩役取諸營兵董役取諸將領  
無躋蹠搜括之苦無誅求侵剋之弊崇墉相望所

在金湯疏聞天子嘉其勞績更下大司馬覆議錫  
之令名盤江曰連雲西坡曰有嘉板橋曰靖氛海  
子曰恬波馬場曰奏膚以上蒙賜名城者又於歸  
集小黃河建龍新城亦資孔建資孔城頂站建鼎  
新城定頭建定邊城尾灑建維藩城阿機建石碁  
城次第告成共建十一座蛇噴豕突之區霾霧昏  
慘嚮所聚族不敢前恟疑駭却者一旦雉堞言言  
旌旗金鼓遠邇相屬負販絡繹烟火湊集又重以

欽名規制赫然重已不佞維君子之仕也既已圭  
組專制一方庶幾利害便宜是故裴行儉之碎葉  
張仁愿之受降遂使西域漠南邊患頓絕作法自  
我安得謂古今之不相及也



貴州通志卷四十一